



### **Dewan Rakyat: Kerajaan tubuh unit khas untuk basmi kemiskinan - Mustapa**

KUALA LUMPUR: Kerajaan bercadang untuk menubuhkan unit khas bagi membasmi kemiskinan, sebagai sebahagian langkah 'bottom-up approach' untuk membantu golongan miskin dan miskin tegar, Dewan Rakyat diberitahu hari ini.

Menteri di Jabatan Perdana Menteri (Ekonomi) Datuk Seri Mustapa Mohamed berkata, sekiranya cadangan itu diluluskan, beberapa pegawai di peringkat pusat akan ditugaskan semula untuk penubuhan unit tersebut.

Tambahnya lagi, beliau juga mengharapkan apabila unit itu direalisasikan, Kerajaan Negeri serta Daerah dapat melakukan perkara yang sama, supaya agenda membasmi kemiskinan itu dapat dilakukan dengan lebih holistik.

"Antara cadangan (yang diterima) supaya kita memberi perhatian lebih kepada miskin tegar. Di Pusat, kita akan melalui penugasan semula pegawai, dan akan menubuhkan sebuah unit (membasmi) kemiskinan di peringkat pusat.

"Kita berharap negeri dan daerah dapat mengambil tindakan yang sama. Dan kita juga harap lebih banyak lagi pencekatan, atau bottom up approach dapat dilakukan," katanya ketika menjawab soalan tambahan Datuk Zakaria Mohd Edris @ Tubau (Bersatu – Libaran) di Dewan Rakyat hari ini.

Terdahulu, Zakaria ingin mengetahui langkah Kerajaan untuk menangani isu 20 peratus isi rumah M40 yang beralih kepada had pendapatan di bawah kumpulan B40, akibat impak COVID-19.

**Menjawab soalan itu, Mustapa berkata, berdasarkan kajian Jabatan Perangkaan, pendapatan purata isi rumah pada 2020 telah menurun sebanyak 10.3 peratus, dengan lebih 600,000 isi rumah M40 telah beralih kepada B40.**

Bagaimanapun, Ahli Parlimen Jeli itu berkata, biarpun kerajaan lebih menasaskan B40, beberapa langkah dan strategi juga telah digariskan dalam Rancangan Malaysia Ke-12 (RMK-12) bagi meningkatkan pendapatan dan kesejahteraan hidup golongan B40 dan M40.

"Tanda-tanda pemulihan sejak Ogos lalu, kadar pengangguran jatuh kepada 4.6%, indeks pembuatan naik 6.8%, dan apabila ekonomi negara pulih, lebih banyak perniagaan dibuka lebih ramai bekerja.

"Seperti diumumkan Menteri Kewangan (Tengku Datuk Seri Mohd Zafrul Tengku Abdul Aziz), Bajet 2021 bertemakan memulih kehidupan, membina daya tahan, dan memangkin daya

ketahana. Langkah-langkah untuk meringankan beban rakyat diumumkan Jumaat nanti,” katanya lagi.

<https://www.astroawani.com/berita-malaysia/dewan-rakyat-kerajaan-tubuh-unit-khas-untuk-basmi-kemiskinan-mustapa-327197>